

劉賓客文集卷十七

唐中山劉禹錫著

狀

爲淮南杜相公論新羅請廣利方狀

淮南節度觀察處置等使敕賜貞元廣利方五卷右臣得

新羅賀正使朴一作休如言狀稱請前件方一部將歸本國

者狀以纂集神效出自聖衷藥必易求疾無隱狀搜方伎

之祕要極生靈之天瘥坐此華胥咸躋仁壽遂令絕域逃

聽風聲美茲置功爰有誠請臣以其久稱藩附素混車書

航海獻琛旣已通於華禮釋痾蠲癘豈獨隔於外區正當

劉賓客文集卷十七

四海爲家冀覩十全之效臣卽欲寫付未敢自專謹錄奏

聞

爲京兆韋尹降誕日進衣狀

衣一副四事黃折造衫一領白吳綾汗衫一領白花羅半

臂一領白花羅袴一腰右伏以正陽今月誕聖嘉辰運協


千年慶流萬國凡在臣子合有獻陳敢傾就日之心願奉

如山之壽輕瀆宸扆無任兢惶

爲京兆李尹降誕日進衣狀

衣一副四事右伏以水德方清真龍下降天長地久瞻北

極以常尊獻壽稱觴配南山而永固臣地居一作宗屬職



泰尹京慶賀之誠倍萬常品前件衣服謹詣銀臺門奉進
輕瀆旒宸伏用兢惶貞元十九年四月十九日

爲京兆韋尹進野豬狀

右伏以收穫之餘田獵有獲異於芻豢著在方書既堪充
庖輒敢上獻前件野豬謹隨狀進謹奏

具官爲杜相公自淮南追入長安至長樂驛謝賜酒食狀

具官臣某右臣今日至長樂驛高品某奉宣聖旨賜臣酒
食者伏以恩降王人榮分御膳未展儀於雙闕先受賜於
八珍品越脹膳味兼醪醴頓驚凡口倍益歡心無任欣躍
具官爲杜相公謝就宅賜食狀

劉賓客文集卷十七

二

具官臣某右高品某奉宣聖旨賜臣食者出自太官飫於
私第光榮曲被猥承推食之恩驚蹇未施益重素餐之責
舉其七筯若負邱山無任戰荷踴躍之至

爲東都韋留守謝賜食狀

具官臣某右臣今日發至長樂驛中使某奉宣聖旨賜臣
食者伏以味兼海陸品溢圓方降自御廚光臨傳舍臣初
辭魏闕倍懷犬馬之誠猥受珍羞更切稻粱之感無任欣
躍

爲裴相公進東封圖狀

集賢殿御書院開元東封圖一面右臣謹按開元十三年

玄宗皇帝以天下太平登封東岳聲明文物振耀古今伏惟陛下丕承耿光再闡鴻業祖宗盛事紹復有期臣所以寫成此圖輒敢上獻至於續畫躬自指揮徵史氏之文纂禮容之要山川氣象悉擬真形羽衛威儀咸稽故實所冀歡情一覽遐想竝蹤臣叨榮過深抱疾已久望陛下告成之日心必前知嗟老臣將謝之年身恐不見疲羸之際感激倍深前件圖謹差某官某謹詣光順門奉進謹奏

舉崔監察羣自代狀

御史臺宣歙池等州都團練判官監察御史裏行崔羣右臣蒙恩授監察御史伏準建中元年正月五日制常參官

劉賓客文集卷十七

三

上後三日舉一人自代者伏以前件官在諸生中號爲國器繫維外府人咸惜之臣既深知敢舉自代貞元十九年閏十月日

舉開州柳使君公綽自代狀

尚書屯田某官等守開州刺史柳公綽右臣蒙恩授尚書屯田員外郎伏準建中元年正月五日制常參官上後三日舉一人自代者伏以前件官以賢良方正再敷王庭在流輩間號爲端士昨除遠郡人皆惜之臣初蒙授官得以論薦多士之內非無其人竊惟用材宜自遠始謹具如前謹錄奏聞伏聽敕旨貞元二十一年四月八日

舉姜補闕倫自代狀

東都尚書省前左補闕姜倫右臣蒙恩授尚書主客郎中分司東都伏準建中元年正月五日敕常參官上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏以前件官有儒學士行蒙以諫官徵會其年老被疾不堪上道有司按視如狀不復逼迫至今家居而篤志無倦臣謹舉爲郎吏分司別都冀優賢振滯兩得其道大和元年六月十四日不
恩蘇州舉韋中丞自代狀

蘇州狀上中書門下諸道鹽鐵轉運江淮留後朝議郎守

劉賓客文集卷十七

四

太僕少卿兼御史中丞上柱國賜紫金魚袋韋應物右臣蒙恩授蘇州刺史伏準建中元年正月五日制刺史上後舉一人自代者前件官歷掌劇務皆有美名執心不回臨事能斷今領職雖重本官尙輕伏以當州口賦首出諸郡况經災沴切在撫綏尙省無能輒敢公舉司權筦之利誠藉時才流豈弟之風實惟邦本非敢臆說以塞詔書今具聞奏大和六年十二月九日

蘇州上後謝宰相狀

朝議大夫使持節蘇州諸軍事守蘇州刺史上柱國劉某右某今月六日到州上訖某山東一書生潦倒疎闊在少

壯日猶不逮人况今衰遲智力愈短相公哀憐不遇擢授
名邦實荷宏獎慙非器使伏以當州繇大祿之後物力蕭
然肌寒殞仆相枕於野誓當悉心條理續具奏論才術素
空憂勞方始懼無聞問忝負恩知不任瞻望懇進之至

蘇州加章服謝宰相狀

右某素乏吏才謬居劇郡以無庸之器當難治之時恭守
詔條勤求人瘼伏以聖德柔遠皇明燭幽凡有上陳皆可
其奏遂令管見得及疲黎自承雨露之恩非有循良之政
猥蒙朝獎特降命書顧逢掖之腐儒被華章之貴服有黷
陟明之典誠招彼己之譏限以守宮不獲拜謝瞻望榮感

劉賓客文集卷十七

五

心魂載馳大和七年十二月日

汝州上後謝宰相狀

朝議大夫使持節汝州諸軍事守汝州刺史兼御史中丞
充本州防禦使上柱國賜紫金魚袋劉某右某自領吳郡
仍歲天災上稟詔條下求人瘼地包藪澤俗尙剽輕悉心
撫綏用法擒擿事繁才短常積憂虞忽蒙天恩稍移近郡
家本榮上籍占洛陽病辭江干老見鄉樹榮感之至實倍
常情印綬所拘不獲拜謝瞻望德宇精誠坐馳無任感戀
之至

汝州舉裴大夫自代狀

正議大夫使持節杭州諸軍事守杭州刺史上柱國賜紫
金魚袋裴宏泰右臣蒙恩授汝州刺史兼御史中丞充本
州防禦使伏準建中元年正月五日敕諸州刺史上後舉
一人自代者伏以前件官前爲九卿出領兩鎮頃因微累
遂有左遷今授遠州物情未塞臣前任鄰接具知公才舊
屈未伸輒舉自代云云

汝州進鷹狀

汝州防禦使當使進奉籠母鷹六聯右伏以前件鷹等學
習應期馴養斯至列於常貢有異眾禽受繼之時志已存
於雲外下韝之際思用展於軍前旣懷百中之能願獻三

劉賓客文集卷十七

六

驅之禮謹差防禦押衙景再休隨狀奉進以聞大和九年
九月十一日

同州舉蕭諫議自代狀

同州防禦使前諫議大夫蕭俶右臣蒙恩授同州刺史兼
御史中丞充本州防禦長春宮等使伏準貞元二年正月
二十四日敕上後三日舉一人自代者伏以前件官生於
貴族伏膺儒門搢紳之間號爲端士昨蒙朝獎冠於諫垣
時方被病不果上道長告已滿塊然家居今聞疾瘳可以
錄用臣與俶久同班列知其材能爲官擇人敢舉自代大
和元年十二月四日

上宰相賀德音狀

同州狀上中書門下今月十六日德音右被刑部牒宣示德音伏以聖澤滋深新恩廣被言念正刑之外或有誣誤之徒爰降殊私特宏在宥瑕累咸滌危疑獲安此皆廟算彌諧致君及物事光前史功格上玄某限以守官不獲隨例拜賀無任抃躍之至大和九年十二月二十三日

上宰相賀改元赦書狀

同州狀上中書門下改元赦書右伏奉今月一日制書改大和十年爲開成元年大赦天下者伏以律首三元禮崇四始順陽和發生之德敷大號渙汗之恩宥過恤刑弛征已責盡去人瘼通知物情德音朝發於九天和氣夕周於四海此皆相公彌諧之道變贊之功進熟於密勿之間發揚成滂沛之澤某恪守官業印綬所拘不獲隨例拜賀

薦處士嚴恣狀

處士嚴恣右左庶子損之之孫國子司業士元之子舊名保嗣亦有官班頃者李賓客渤海常與之遊辟爲桂州支使其後寄家汝海專靜自居某嘗典汝州與語甚熟歷代史及國朝故事悉能該通操心甚危觀跡相副未逢知己已過壯年汨沒風塵有足悲者伏見赦文節目委州郡長吏搜訪隱淪夫舉薦無它唯善所在每覽珠一作珠英卷後列

學士姓名有常州人符鳳白衣在選馭其藝業不棄遠人
某忝被儒官得以薦士亦非出位冀不廢言儻宏文集賢
史氏之館採其實學有勸諸生伏以桂州辟之於前某薦
之於後豈必有士長吏然後事行伏惟試味斯言降意詳
擇謹狀

薦處士王龜狀

處士王龜古者選公族大夫必以惇惠者教之文敏者道
之果敢者諗之鎮靜者循之孜孜於此者蓋膏梁之性難
正而懼公侯之膺不能嗣其耿光可以深惜然則成宣之
後而老爲大夫非恥乎此智武子誠文子旣冠而見之詞

劉賓客文集卷十七

八

也是知古之取士不專寒族必參用世胄以廣得人之路
今見處士王龜卽居守之第三子也天性貞靜操心甚危
不由門資誓志自立樂處士之號不汨綺襦之間自到洛
都便居山寺耽玩墳籍放情煙霞曾邀與語如鋸木屑信
有稟受居然出羣以比在京師甚足知者諫院有狀名流
函言某流滯周南靜閱時輩身雖不用心甚愛才况遇相
公持衡敢有所啟誠懸之下輕重難欺伏惟深賜詳擇知
卿族之內有遺逸焉謹狀正議大夫檢校禮部尙書兼太
子賓客分司東都劉某狀

劉賓客文集卷十七終

劉賓客文集卷十八

唐中山劉禹錫著

啓

上杜司徒啓

時謫朗州

某啓一自謫居七悲秋氣越聲長苦聽者誰哀湯網雖疎久而猶誑失意多病衰不待年心如寒灰頭有白髮惕厲之日利於退藏是以彌年不敢奏記近本州徐使君至奉手筆一函稱謂不移問訊加劇重復黠竄一無客言忽疑此身猶在門下收紙長想欣然感生尋省遭罹萬重不幸方寸之地自不能言求人見諒豈復容易伏蒙遠示且曰浮謗漸消况承慶宥期以振刷方今聖賢合德朝野多歡澤柔異類仁及行葦萬族咸說獨爲窮人四時平分未變寒谷自同類牽復又已三年側聞眾情或似哀歎某材略無取廢錮是宜若非舊恩孰肯留念六翮方鍛思重託於扶搖孤桐半焦冀見收於煨燼伏紙流涕不知所言謹啓

上淮南李相公啓

某啓某向以昧於周身措足危地駭機一發浮謗如川巧言竒中別白無路祝網之日漏恩者三咋舌兢魂分終齎壤豈意天未斲絕仁人登庸施一陽於剝極之際援眾溺於坎深之下南箕播物不勝昌言危心鍛翻繇是自保陰

施之德已然乃聞受恩同人盟以死答私感竊抃積於窮
年化權禮絕孤志莫展今幸伍中牽復司存宇下伏慮因
是記其姓名謹獻詩二篇敢聞左右古之所以導下情而
通比興者必文其言以表之雖叱謠俚音可儷風什伏惟
降意詳擇斯大幸也謹因楊子程留後行謹奉啓不宣謹

啓
某啓去年本州吏人自蜀還伏奉示問兼衣服繪綵等雲
路遙緘膝脫厚恭承惠下之旨重以念舊之懷熙如陽

和列在緗簡苦心多感危涕自零驚神驛思若侍穎杖伏

劉賓客文集卷十八

二

以聖上注意理本銳求國楨念外臺報政之功追宣室前
席之事重下丹詔再升黃樞羣情合符和氣來應八柄所
在三人同心協台坐之精膺傑材之數談笑於規隨之際
從容於陶冶之間物皆由儀人識所措某久罹憲網兀若
枯株當萬類咸說之辰抱窮途終慟之苦清朝無絳灌之
列至理絕椒蘭之嫌此時不遇可以言命嗟乎一身主祀
萬里望粉榆之鄉高堂有親九年居蠻貊之地從坐之典
固有等差同類之中又尋牽復頃在臺日獲奉準繩指吏
途於按讞遵文律於章奏藻鑿之下難逃陋容炎涼載移
足見真態自違間左右沈淪遐荒歲月滋深艱貞彌厲緬

想受譴之始它人不知屬山園事繁孱懦力竭本使有內
嬖之吏供司有恃寵之臣言涉猜嫌動礙關東城社之勢
函矢紛然彌縫其間崎嶇備盡始慮罪因事闕甯虞謗逐
跡生智乏周身又誰咎也伏以趙國公頃承一顧一作之顧遇
重高邑公夙荷見知之深雖提挈不忘而顯白無自蓋以
永貞之際皆在外方雖得傳聞莫詳本末特哀黨錮亟形
話言自前歲振淹命行中止或聞與論亦愍重傷伏遇相
公秉鈞輒已自賀儻重言一發清議攸同使聖朝無錮人
大冶無廢物自新之路既廣好生之德遠彰羣蟄應南山
之雷窮鱗得西江之水指顧之內生成可期伏惟發膚寸
之陰成彌天之澤回一瞬之念致再造之恩誠無補於多
事之時庶有助於陰施之德無任懇悃之至謹啓

上中書李相公啓

某啓去年國子主簿楊歸厚致書相慶伏承相公言及廢
錮愍色甚深哀仲翔之久謫恕元直之方寸思振淹之道
廣錫類之仁遠聆一言如受華袞伏自不窺牆仞九年於
茲高卑邈殊禮數懸絕雖身居廢地而心恃至公伏以相
公久以訐謖參於宥密材旣爲時而出道以得君而亨令
發於流水之源化行猶偃草之易習強仇者自納於軌物
困杼軸者咸躋於仁壽六轡在手平衡居心運思於陶冶

之間宜猷於魚水之際然能軫念廢物遠哀窮途嗟哉小
生有足悲者內無手足之助外乏強近之親爲學苦心本
求榮養得罪由己翻乃貽憂捫躬自劾愧入肌骨禍起飛
語刑極淪胥心因病怯氣以愁耗近者否運將泰仁人持
衡伏惟推曾閔之懷憐烏鳥之志處夔龍之位傷屈賈之
心沛然垂光昭振幽蟄言出口吻澤濡寰區昔者行葦勿
傷枯骼猶掩哀老以出幣愍窮而開懷無情異類尙或嬰
慮顧惟江干逐客曾是相府故人言念材能誠無所取譬
諸飛走庸或知恩嗚呼以不駐之光陰抱無涯之憂悔當
可封之至理爲永廢之窮人聞弦尙驚危心不定垂耳斯

劉賓客文集卷十八

四

久長鳴孔悲腸回淚盡言不宜意謹啓

請派謝門下武相公啓

某啓某一坐飛語廢錮十年昨蒙徵還重罹不幸詔命失
下周章失圖吞聲咋舌顯白無路豈謂烏鳥微志惻於深
仁恤然動拯溺之懷煦然存道舊之旨言念黻黜慰安蒼
黃推以恕心期於造膝重言一發叡聽克從回陽曜於蕭
殺之辰沃天波於踳躓之際俾移善地獲奉安輿率土知
孝治之源羣生識人倫之厚感召和氣發揚皇風豈惟匹
夫獨受其賜某卽以今月十一日到州上訖守在要荒拘
於印綬中鞫詣謝有志莫從誠知微生不足酬德捐軀之

外無地寄言效節蕭蕭一作屏虔然心禱無任懇悃屏營之
至謹勒軍事衙官左威衛慈州吉昌府別將員外置同正
員常懇奉啓起居不宣謹啓

謝中書張相公啓

某啓某智乏周身動必招侮一坐飛語如衝駭機昨者詔
書始下驚懼失次叫閭無路擠壑是虞草木賤軀誠不足
惜烏鳥微志實有可哀伏蒙聖慈遽寢前命移莅善部載
形綸言凡在人臣皆感至德凡爲人子同荷至仁豈唯鰥
生獨受其賜伏以相公心符上德道冠如仁一夫不獲戚
見於色密旨未下歎形於言竟回三舍之光能拔九泉之
厄袁公之平楚獄不忍錮人晏子之哀越石乃伸知己所
以慶垂肩祥言成春秋神理孔昭報應斯必身侔蟬翼何
以受恩死輕鴻毛固得其所卑守有限拜謝末由無任感
激兢惶之至謹勒軍事衙官守左威衛慈州吉昌府別將
員外置同正員常懇奉啓起居不宣謹啓

賀門下裴相公啓

某啓伏以相公含道傑出降神挺生坐籌以弼叡謨秉鉞
以行大討風雲助氣川岳效靈制勝於尊俎之間指蹤於
韞緜之末蕭斧旣定袞衣以歸君心如魚水人望如風草
一德交暢萬邦和平運神思於洪鑪納生靈於壽域文武

丕績冠於古今某恪守遐荒不獲隨例拜賀

上門下裴相公啓

某啓曩者淮右逋誅卽戎歲久天子齋戒以命元臣登壇之日上略前定從九天而下縱以神兵分六符之光歸其長彗授鉞於西顛之半策勳於北陸之初功成偃節復執大柄君臣相遇播於樂章山河啓封載在盟府上方注意人益具瞻因魚水之協符極夔龍之事業時屬四時恩覃萬方致君及物其德兩太古先峻賢所未備者我從容而保之殆非人事抑有幽贊夫異同之論我以獨見剖之文武之道我以全材統之崇高之位我以大功居之造物之

劉賓客文集卷十八

六

權我以虛心運之然持盈之術古所難也實在陰施及物厚其德基以左右功庸而百祿是荷人所欽戴久而愈宜昔袁太尉不忍錮人而楚獄衰息一言之慶子孫丕承以今日將明之材行前修博施之義筆端膚寸澤及九垓猶夫疾耕必有滯穗某頃墮危厄嘗受厚恩詛盟於心要之自效常懼廢死荒服永辜願言敢因賀踐一寄丹懇顧非奇理不足以縈於沖襟然則利於行者固在乎常談而卓詭孤特之言未必利於行也伏惟以愚言與賢者參之謹

啓

賀門下李相公啓

自西川入爲大夫拜相

某啓伏以聖君當功成愷樂之日而求賢愈切思治益深
是上立垂休欲速致太平之明效以相公事業
逢此時
天下之人視仁壽之域其猶尋尺故命書所至德風隨之
微材片善咸自磨拂况同主國柄如吹埴篴含生之倫唯
所措置日月亭午物無邪陰聖賢合德人識正道雖居畎
畝足以詠歌某遐守要荒不獲隨例拜賀私感竊并實倍
恆情

上僕射李相公啓

某啓州吏還伏蒙擺落常態手筆具書言及貞元中登朝
人逮今無十輩及發中書相公一函具道閣下亟言曩遊
顏間頗有衰色夫溝中之木與犧象同體雕琢不至生成
枯薪朱而藍之猶足爲器苟液櫛曲戾不足枉斧斤願爲
庭燎以照嘉客謹啓

謝裴相公啓

某啓某遭不幸歲將二紀雖累更符竹而未出網羅親知
見憐或有論薦如陷還瀟動而愈沈甘心終否無路自奮
豈意天未勦絕仁人持衡紆神慮於多方起堙淪於久廢
居剝極之際一陽復生出坎深之中平路資始通籍耶位
分曹樂都喬木展舊國之思行雲有故山之戀姻族相賀
壺觴盈門官無責詞始自今日禽魚之志誓以死生草木

之年惜其晚晚章程有守拜謝無由瞻望巖廊虔然心禱
謹啓

謝寶相公啓

某啓某一辭朝列二十三年雖轉郡符未離謫籍卑溼生
疾衰遲鮮歡望故國而未歸如瘵人之念起昨蒙罷免甘
守邱園相公不棄舊遊特哀久廢每奉華翰賜之衷言果
蒙新恩重忝清貫薦延有漸拯拔多方六律變幽谷之寒
一丸銷彌年之疹鍛剛將舉危心獲安布武夷途自此而
始分曹有繫拜謝無由瞻望德藩坐馳精爽無任感激之
至謹啓

劉賓客文集卷十八

八

劉賓客文集卷十八終

劉賓客文集卷十九

唐中山劉禹錫著

集紀

唐故相國李公集紀

天以正氣付偉人必飾之使光耀於世粹和網緼積於中

鏗鏘發越形乎文

一作外

文之細大視道之行止故得其位

者文非空言咸繫於訐謨宥密庸可不紀惟唐以神武定天下羣慝既讐驟示以文韶英之音與鉦鼓相襲故起文章爲大臣者魏文貞以諫諍顯馬高唐以智略奮岑江陵以潤色聞無草昧汗馬之勞而任遇在功臣上唐之貴文

劉賓客文集卷十九

一

至矣哉後王纂承多以國柄付文士元和初憲宗遵聖祖故事視有宰相器者貯之內庭繇是釋筆硯而操化權者十八九公實得時而光焉公諱絳字深之趙郡人在貢士中傑然有奇表旣登太常第又以詞賦陞甲科授祕書省校書郎歲滿從調有司設甲乙問以觀決斷復居高品補渭南尉擢拜監察御史未幾以本官充翰林學士居中轉尙書主客員外郎歷司勳郎中知制誥遷中書舍人風儀峻整敷奏讜切言事感動上輒目送之一旦召至浴堂門與語半日曰將移用於大位宜稔熟民聽遂出爲戶部侍郎遷中書侍郎同平章事毅然有直聲及册免而問望益

大周旋公卿間五爲尙書歷御史大夫左僕射一以三公
領太常刺近輔居保釐登齋壇皆再焉大和三年以司空
鎮南鄭居二歲坐氣剛玉折海內冤惜之後三年嗣子前
京兆府尹曹掾璆次子前監察御史襄行頊等泣持遺草
請編之肇自從試有司至於宰天下詞賦詔誥封章啓事
詩詩贈餞金石颺功凡四百餘篇勒成二十卷上所以知
君臣啓沃之際下所以備風雅詩聲之義洪鐘駭聽瑤瑟
清骨其在翰苑及登台庭極言大事誠貫理直感通神祇
龍鱗收怒天日回照古所謂一言興邦者信哉始愚與公
爲布衣游及仕畿服幸公同邑其後雖翔泳勢異而不以

劉賓客文集卷十九

二

名數革初心今考其文至論事疏感人肺肝毛髮皆聳鳴
呼其盛唐之遺直歟

唐故中書侍郎平章事韋公集紀

漢庭以賢良文學徵有道之士公孫宏條對第一席其勢
鼓行人間取丞相且侯使漢有得人之聲伊宏發也皇唐
文物與漢同風故天后朝燕國張公說以詞標文苑徵立
宗朝曲江張公九齡以道伴伊呂徵德宗朝天水姜公公
輔杜陵韋公執誼河東裴公垣以賢良方正徵憲宗朝河
南元公稹京兆韋公滄以才識兼茂徵隴西牛公僧孺李
公宗閔以能直言極諫徵咸用對策甲於天下繼爲有聲

宰相古今相望落落然如騎星辰與夫起版築飯牛者異矣公本名清舉進士登賢良既仕方更名處厚字德載漢丞相扶陽侯之裔孫後周逍遙公負之八代孫江陵節度參謀監察御史襄行贈右僕射革^{一作}某之元子生而聰明絕人在提孩發言成詩未幾能賦受經於先君僕射學文於伯舅許公孟容及壯通六經旁貫百氏咨天人之際遂探歷數明天官窮性命之源以至於佛書尤邃初爲集賢殿校書郎宰相李趙公監修國史引直東觀就政^{一作}咸陽尉遷右拾遺轉左補闕世稱有史才能諫諍入尚書爲郎歷禮部考功皆人望所在上方用威武以讐不庭宿

劉賓客文集卷十九

三

兵寢久韋丞相貫之酌人情上言不合意册免因歷詆所善公在伍中出爲開州刺史居三年執友崔敦詩爲相徵拜戶部郎中至闕下旬歲間以本官知制誥穆宗新卽位注意近臣召入翰林充侍講學士初授諫議大夫續換中書舍人侍游蓬萊池延問大義退而進六經法言二十篇優詔答之賜以金紫尋遷權知兵部侍郎知制誥翰林侍講史館修撰長慶四年春敬宗踐阼以公用經術左右先帝五年稔聞其德尤所欽倚內署故事與外廷不同凡言翰林學士必草詔書有侍講者專備顧問雖官爲中書舍人或它官知制誥第用其班次耳不竄言於訓詞至是上

器公且有以寵之乃使內謁者申命去侍講之稱慮未諭於百執事居數日降命書重舉舊官以明新意尋眞拜夏官貳卿由是內庭詞臣無出其右者凡密旨必承乎權輿故號承旨學士上富春秋未親爲政或有凝滯視公如著龜寶歷季年宮壺間一夕生變人情大駭雖鼎臣無所關決唯內署得參焉羣議閔胡貢反然俟公一言而定哉難纘服再維乾綱今上繼明策勳第一擢拜中書侍郎同中書門下平章事以高材遇英主功顯人伏言無不從筆端膚寸澤及天下盡罷冗食請歸材人事先有司物止常貢城社無託巖廊益尊感恩盡瘁不齎神用大和二年十二月

劉賓客文集卷十九

四

上前言事未及畢詞疾作暴債

一作未及畢辭疾暴作

以廢服委地

同列白奏搢笏扶持之不能起上命中貴人左右翼負歸於中書如大醉狀上震驚咨嗟徵醫賜藥旁午疊委會莫肩輿至第詰旦以不起聞贈禔加常禮後十年嗣子蕃以太子舍人直弘文館編次遺文七十通銜哀貢誠乞詞以冠其首謹按公未爲近臣已前所著詞賦讚論記述銘志皆文士之詞也以才麗爲主自入爲學士至宰相以往所執筆皆經綸制置裁成潤色之詞也以識度爲宗觀其發德音福生人沛然如時雨衰元老論功臣穆然如景風命相之册和而莊命將之詰昭而毅薦賢能其氣似孔文舉

論經學其博似劉子駿發十難以摧言利者其辯似管夷吾噫逢時得君奮智謀以取高位而令名隨之豈不偉哉初蕃既纂修父書咨於先執李習之請文爲領袖許而未就一旦習之憮然謂蕃曰矧昔與韓吏部退之爲文章盟主同時倫輩惟柳儀曹宗元劉賓客夢得耳韓柳之逝久矣今矧又被病慮不能自述有孤前言齋恨無已將子薦誠於劉君乎無何習之夢奠於襄州蕃具道其語余感相國之平昔且嘉蕃之虔虔孝敬庶幾能世其家故不讓云

唐故相國贈司空令狐公集紀

唐故相國贈司空令狐公集紀

劉賓客文集卷十九

五

萬物而與令名相終始者有唐文臣令狐公實當之公名楚字殼士燉煌人今占數於長安右部天授神敏性能無師始學語言乃協宮徵故五歲已爲詩成章旣冠參貢士果有名字時司空杜公以重德知貢舉擢居甲科琅邪王拱識公於童丱雅器重之至是拱自虞部正郎領桂州鏡於辟賢以酬不次之遇先拜章而後告公旣而授試宏文館校書郎公爲人子重難遠行稟命而去居一歲竟迫方寸而歸家在并汾間急於祿養捧從事檄於并州凡更三牧官至監察御史元和初憲宗聞其名徵拜右拾遺歷太常博士入尙書爲禮部員外郎性至孝旣孤以善居喪聞

中月除刑部員外時帝女下嫁相禮闕官公以本官攝博士當問名之夕上親臨帳幄簾內以窺之禮容甚偉聲氣朗徹上目送良久謂左右曰是官可用記其姓名未幾改職方知制誥詞鋒犀利絕人遠甚適有旨選司言高第者視草內庭宰臣以公爲首遂轉本司郎中充翰林學士滿歲遷中書舍人專掌內制武帳通奏柏梁陪燕嘉猷高韻冠於一時會淮右稽誅上遣丞相卽戎以督戰公草詔書詞有涉嫌者相府上言有命中書參詳竄定因罷內職歸閣中而君心眷然將有大用且出入以試之乃牧華州兼御史中丞錫以金紫居鎮七月遷大夫充河陽三城懷州

劉賓客文集卷十九

六

節度使又七月急召抵京師拜中書侍郎同中書門下平章事天下然後知上心倚以爲相非一朝也是歲元和十四年秋明年正月憲宗晏駕惜其在位日淺遭時大變穆宗踐阼轉門下侍郎平章事萬幾百度別有所付第以舊相署位充山陵使七月禮畢部下吏有以贓狀聞者朝典用責率之義是以左授宣歙池等州都團練觀察處置使兼御史大夫恩顧一異媒孽隨生旋又貶衡州刺史移郢州轉太子賓客分司東都尋起爲陝虢觀察使或有上封者稱前以奉陵寢不檢下獲譴今陵土猶溼未宜遽用次陝一日重爲賓客分司長慶四年改河南尹其秋授檢校

禮部尙書兼汴州刺史充宣武軍節度管內觀察處置等使汴州爲四戰之地擇帥先有功峻刑右武疑似沈命號爲危邦者積年公始以清儉自律以恩信待人以夷坦去羣疑以禮讓汰慘急自上化下速於置郵泮林革音無復故態璽書勞之就加大司馬文宗纂服三年冬上表以大
臣未識天子願朝正月制曰可操節入覲遷戶部尙書俄爲東都留守又轉檢校尙書右僕射兼鄆州刺史天平軍節度使後以王業之始實爲北京移鎮太原從人望也以吏部尙書徵續換太常卿真拜尙書左僕射大和九年冬十一月京師有急兵起上方御正殿卽日還宮是夕召公

劉賓客文集卷十九

七

決事禁中以見

賢徧友

事傳一作傳

古義爲對其詞謹切無所

願望上心嘉之居一二日守本官兼諸道鹽鐵轉運使以幹利權旣非素尙佗佗牢讓故復爲檢校左僕射興元尹山南西道節度觀察使兼御史大夫開成二年十一月十二日薨於漢中官舍享年七十齋終之前一日自修遺表初述感恩陳力之大義中及朝廷刑政之或闕意切言盡神識不昏上深悼之形於愍冊未登三事故以贈之歸全之夕有大星隕於正寢之上光燭於庭天意若曰旣稟之而生亦有涯而落其文章貴壽之氣焰歟初憲宗覽國書見五王復辟之際狄梁公實尸之公爲台臣獨召便殿問

曰仁傑有後乎公以其支孫試校書郎兼謩爲對卽日拜左拾遺公遂草制它日相銜者因挾其詞以爲非春秋諱魯之旨穆宗新卽位謙讓不自決遂有衡州之貶公議冤之嗟乎天之於賦子也甚嗇而難周公獨富文章丁良時歷名卿至元老蓋忠廉孝友愛才與物合是粹美以將之邪可謂全德矣旣免喪嗣子左補闕絢集公之文成一百三十卷因長子太子左諭德宏分司東都負其笥來謁泣曰先正一作贈司空與丈人爲顯交撤懸之前五日所賦詩寄友非他人也今手澤尙存言之嗚咽長號子亦爲之慟收淚而視分當編次之始公參大鹵記室以文雄於邊議

劉賓客文集卷十九

八

者謂一方不足以騁用徵拜於朝累遷儀曹郎乃登西掖入內署訐謨密勿遂委魁柄斯以文雄於國也嗚呼咫尺之管文敏者執而運之所知皆合在藩聳萬夫之觀望立朝賁羣寮之頰舌居內成大政之風霆導暎澹於章奏鼓洪瀾於訓誥筆端膚寸膏潤天下文章之用極其至矣而又餘力工於篇什古文士所難兼焉昔王珣爲晉僕射夢人授大筆如椽覺而謂人曰此必有大手筆事後孝武哀册文乃珣之詞也公爲宰相奉詔撰憲宗聖神章武孝皇帝哀册文時稱乾陵崔文公之比今考之而信故以爲首冠尊重事也其它各以類聚著於篇

唐故尚書主客員外郎盧公集紀

心之精微發而爲文文之神妙詠而爲詩猶夫孤桐朗玉自有天律能事具者其名必高名由實生故久而益大尚書郎盧公諱象字緯卿始以章句振起於開元中與王維崔顥比肩驥首鼓行於時妍詞一發樂府傳貴由前進士補祕書省校書郎轉右衛倉曹掾丞相曲江公方執文衡揣摩後進得公深器之擢爲左補闕河南府司錄司勳員外郎名盛氣高少所卑下爲飛語所中左遷齊汾鄭三郡司馬入爲膳部員外郎時大盜起幽陵入洛師東夏衣冠不克歸王所爲虜劫執公墮脇從伍中初謫果州長史又

劉賓客文集卷十九

九

貶永州司戶移吉州長史天下無事朝廷思用宿舊徵拜主客員外郎道病留武昌遂不起故相崔太傅時爲右史方在鄂以文誌其墓其詞曰噫公妙年有聲振耀當代翱翔雲路不虞矰則層反繳盛名先物易生痼疵三至郎署坐

成遺耄踰蹬江皋棲棲沒齒見知者恨之公遠祖元魏北齊後周皆爲帝師公之叔父嵩山逸人諫議大夫顥然真隱者也公下世後七十三年其孫元符捧遺草來乞詞以表之嘗經亂離多所散落今之存者十有二卷凡若干篇

唐故衡州刺史呂君集紀

五行秀氣得之居多者爲俊人其色激灑於顏間其聲發

而爲文章天之所與有物來相彼由學而致者如工人染
夏以視羽畎有生死之殊矣初貞元中天子之文章煥乎
垂光慶霄在上萬物五色天下文人爲氣所召其生乃蕃
靈芝萋莆與百果齊坼然煌煌翹翹出乎其類終爲偉人
者幾希矣東平呂和叔實生是時而絕人遠甚始以文學
震三川三川守以爲貢士之冠名聲四馳速如羽檄長安
中諸生咸避其鋒兩科連中芒刃愈出德宗聞其名自集
賢殿校書郎擢爲左拾遺明年大戎請和上問能使絕域
者君以奇表有專對材膺選轉殿內史錫之銀章還拜尙
書戶部員外郎轉司封遷刑部郎中兼侍御史副治書之

劉賓客文集卷十九

十

職會中執法左遷緣坐道州刺史以政聞改衡州年四十
而沒後十年其子安衡泣捧遺草來謁咨余紀一作敘之成

一家言凡二百篇和叔名溫別字化光祖考皆以文學至
大官蚤聞詩禮於先侍郎又師吳郡陸贄通春秋從梁肅
學文章勇於藝能咸有所祖年益壯志益大遂撥去文學
與雋賢交重氣槩覈名實歆然以致君及物爲大欲每與
其徒講疑考要王霸富彊之術臣子忠孝之道出入上下
百千年間詆訶角逐疊發連注得一善輒盱衡擊節揚袂
頓足信容得色舞於眉端以爲按是言循是理合乎心而
氣將之昭昭乎若揭日月而行孰能闕其勢而爭夫光者

乎烏呼言可信而時異道甚長而命窄精氣爲物其有所歸乎古之爲書者先立言而後體物賈生之書首過秦而荀卿亦後其賦和叔年少遇君而卒以謫似賈生能明王道似荀卿故余所先後視二書斷自人文化成論至諸葛武侯廟記爲上篇其它咸有爲而爲之始學左氏書故其文微爲富豔夫羿之關弓唯巴蛇九日乃能盡其殼而回注鷓鴣亦要失中於尋常之間非羿之手弓有能有不能所遇然也後之達解者推而廣之知余之素交不相索於文字之內而已

唐故尚書禮部員外郎柳君集紀

劉賓客文集卷十九

八音與政通而文章與時高下三代之文至戰國而病涉秦漢復起漢之文至列國而病唐興復起夫政靡而土裂三光五嶽之氣分扶問反大音不完故必混一而後大振初貞元中上方嚮文章昭回之光下飾萬物天下文士爭執所長與時而奮粲焉如繁星麗天而芒寒色正人望而敬者五行而已河東柳子厚斯人望而敬者歟子厚始以童子有奇名於貞元初至九年爲名進士十有九年爲材御史二十有一年以文章稱首入尚書爲禮部員外郎是歲以疎雋少檢獲訕出牧邵州又謫佐永州居十年詔書徵不用遂爲柳州刺史五歲不得召病且革留書抵其友中

山劉某曰我不幸卒以謫死以遺草累故人某執書以泣遂編次爲三十通行於世子厚之喪昌黎韓退之誌其墓且以書來弔曰哀哉若人之不淑吾嘗評其文雄深雅健似司馬子長崔蔡不足多也安定皇甫湜於文章少所推讓亦以退之之言爲然凡子厚名氏與仕與年暨行己之大方有退之之誌若祭文在今附於第一通之末云

董氏武陵集紀

片言可以明百意坐馳可以役萬景工於詩者能之風雅體變而興同古今調殊而理具達於詩者能之工生於才達生於明二者還相爲用而後詩道備矣余嘗執斯評爲

劉賓客文集卷十九

公是且衡而度之誠懸平心默揣羣才鈞銖尋尺隨限而盡如有所閱者百態一旦得董生之詞杳如搏翠屏浮層瀾視聽所遇非風塵間物亦猶明金粹羽得於遐裔雖欲勿寶可乎生名挺字庶中幼嗜屬詩晚而不衰心原爲鑪筆端爲炭鍛鍊元本雕礪羣形札紛舛錯逐意奔走因故沿濁協爲新聲嘗所與游者皆青雲之士聞名如盧杜盧員外甫高韻如包李包祭酒佶李侍郎紆迭以章句揚於當時末路寡徒值余歡甚因相謂曰聞者以廷尉屬爲荊州從事移疾罷去幽臥於武陵迨今四年言未信於世道不施於人寓其性懷播爲吟詠時復發笥紛然盈前凡五十篇因地

爲目吾子常號知我盍表而志之爲生羽翼余不得讓而
著於篇因系之曰詩者其文章之蘊邪義得而言喪故微
而難能境生於象外故精而寡和千里之繆不容秋毫非
有的然之姿可使尸曉必俟知者然後鼓行於時自建安
距永明已還詞人比肩唱和相發有以朔風零雨高視天
下蟬噪鳥鳴蔚在史策國朝因之粲然復興由篇章以躋
貴仕者相踵而起兵興已還右武尙功公卿大夫以憂濟
爲任不暇器人於文什之間故其風寢息樂府協律不能
足去聲新詞一作音以度曲夜諷之職寂寞無紀則董生之貧
臥於齋土也其不得於時者歟其不試故藝者歟

劉賓客文集卷十九

三

澈上人文集紀

釋子工爲詩尙矣休上人賦別怨約法師哭范尙書咸爲
當時才士之所傾歎厥後比比有之上上人生於會稽本湯
氏子聰察嗜學不肯爲凡夫因辭父兄出家號靈澈字源
澄雖受經論一心好篇章從越客嚴維學爲詩遂籍籍有
聞去聲維卒乃抵吳興與長老詩僧皎然游講藝益至皎然
以書薦於詞人包侍郎佶包得之大喜又以書致於李侍
郎紆是時以文章風韻主盟於世者曰包李以是上人之
名由二公而颺如雲得風柯葉張王以文章接才子以禪
理說高人風儀甚雅談笑多味貞元中西遊京師名振輦

下緇流疾之造飛語激動中貴人因侵誣得罪徙汀州會
赦歸東越時吳楚間諸侯多賓禮招延之元和十一年終
於宣州開元寺七十有一門人遷之建塔於越之山陰天
柱峯之陔從本教也初上人在吳興居何山與畫公爲侶
皎然字晝
時以字行時子方以兩髦執筆視陪其吟詠皆曰孺子可
教後相遇於京洛與支許之契焉上人沒後十七年子爲
吳郡其門人秀峯捧先師之文來乞詞以志且曰師嘗在
吳賦詩僅二千首今刪取三百篇勒爲十卷自大厯至元
和凡五十年間接詞客聞人酬唱別爲十卷今也思行乎
昭代求一言羽翼之因爲評曰世之言詩僧多出江左靈
一導其源護國襲之清江揚其波法振沿之如么弦孤韻
瞥入人耳非大樂之音獨吳興畫公能備眾體畫公後澈
公承之至如芙蓉園新寺詩云經來白馬寺僧到赤烏年
謫汀州云青蠅爲弔客黃耳寄家書可謂入作者闔域豈
獨雄於詩僧間邪

劉賓客文集卷十九

劉賓客文集卷二十

唐中山劉禹錫著

雜著

傷我馬詞

馬龍類蓋健而善馳君子之所宜求爲器也故法求於力或逸而善駭法求於和或乾而易仆由德稱者鮮焉曩子知善馬之難遭也不求於肆而於其鄉一旦果得之陰山之阿躩略其形蕭蕭其鳴長顧遠視順而能力顧其軀非騫然而偉也雖儒士得以乘之始子被皂衣於朝朝之人多四三其牡以迭馭子無兼焉一作馬水轍之淋漉淖途之

劉賓客文集卷二十

一

汪洋結爲确犖融爲坳堂前有憤輶後有濡裳我策垂空我鑣方揚振鬣軒昂矯如飛翔翹翹其雄也非力而何烈火之具舉鈎膺之疊舞一蹊千趾駢比齟齬彥者斯擠悍者斯怒我鞍如山我轡如組弭毛容與宛若孤處靡靡其柔也非慧而何前日子之獲譴於闕下背商顏趣昭邱日中而踰舍修門之南非騎所宜夷則沮洳高則啾噉虎咆空林螿鬪荒虺風雨孤征簡書之威伸子弗顛我馬焉依屑屑其勞也非德而何子至武陵居沅水之傍或踰月未嘗跨焉以故莫得伸其所長踟躕顧望兮頓其鎖韁飲齟日削兮精耗神傷寒樾騷騷兮瘁毛蒼涼路聞躑躅兮逸

氣騰驪翔雲深兮邊草遠意欲往兮聲不揚隕然似一作

不得其所而死故其嗟也兼常初立宗羈大宛而盡有名馬命典牧以時起居洎西幸蜀往往民間得其種而蕃焉故良毛色者率非中土類也稽是毛物豈祖於宛歟漢之歌曰龍爲友武陵有水曰龍泉遂歸骨於是川且弔之曰生於積礪善馳走萬里南來困邱阜青菰寒菽非適口病聞北風猶舉首金臺已平骨空朽投之龍淵從爾友

口兵戒

并序

余讀蒙莊書曰兵莫慘於志一作莫邪爲下缺然知志士

之傷夫生也它日讀遠祖中壘校尉書曰口者兵也盡然

劉賓客文集卷二十

二

知言之爲兵又慘乎志因博考前載極其兩端夫志兵之薄人激烈抗憤不過無從容於世耳口兵之起其刑渥焉繇是知我祖之言爲急作戒以書於盤盂

五刃之傷藥之可平一言成痾智不能明人或罹兵道塗

奔救投方效技恩恐其後人或罹譖比肩狐疑借有解紛

毀輒隨之故曰舌端之孽慘於楚鐵夷竈誠謀執戈以驅

掩人誠智折筭以詈賢者誨子信其有旨發言之難伸舌

一作往古猶爾辯爲詐媒默爲德基玉積不啓孰能瑕疵擥麋

深居孰謂可噬戒哉一無此我口一作之啓爾一作心之

門無爲我兵當爲我藩以慎爲鍵以忍爲闔可以多食勿

以多言

猶子蔚適越

一作趙 戒

猶子蔚晨跪於席端曰臣幼承叔父訓始句萌至於扶疎
前日不自意有司以名污賢能書又不自意被丞相府召
爲從事重兢累媿懼貽叔父羞今當行乞辭以爲戒余曰
若知彝器乎始乎斲輪因入規矩剗中廉外枵然而有容
者理賦質堅然後加密石焉風戾日晞不剖一作不聲五
友然後青黃之鳥獸之飾乎瑤金貴在清廟其用也纂以
養潔其藏也積以養光苟措非其所一有毫髮之傷儼然
與破甑爲伍矣汝之始成人猶器之作朴是宜力學爲礪

劉賓客文集卷二十

三

斲新賢爲青黃睦僚友爲瑤金忠所奉爲清廟盡敬以爲
纂慎微以爲積去怠以護傷在勤而行之耳設有人思披
重霄而挹顛氣病無階而升有力者揭層梯而倚泰山然
而一舉足而一高非獨揭梯者所能也凡天位未嘗曠故
世多貴人唯天爵并者乃可偉耳夫偉人之一顧踰乎華
章而一非亦慘乎黜別行矣慎諸吾見垂天之雲在爾肩
腋間矣昔我友柳儀曹嘗謂吾文儁而膏味無窮而炙愈
出也遲汝到丞相府居一二日袖吾文入謁以取質焉丞
相我友也汝事所從如事諸父借有不如意推起敬之心
以奉焉無忽

客有以博戲自任者速余觀焉初主人執握槊之器寘於
廡下曰主進者要約之既揖讓卽次有博齒二異乎古之
齒其制用骨觚稜四均鏤以朱墨耦而合數取應期月視
其轉止依以爭道是制也道行之久矣莫詳所祖以其用
必投擲故以博投詔之是日客抵骨於局且祝之曰其來
如趨其去如脫事先趨超命中無蹉跌無從彼呼無戾我
恆分曹適迫自朝至於日中稷稷昞也而率一無與所祝
異焉客視骨如有情焉如或馮焉悉詈之不泄又從而齟
齟蹂躪之莫顧其十日之哈讓也乃曰非子術之不工是

劉賓客文集卷二十

四

朽骼者不予畀也請刷恥於弈碁主人云從命命燭以續
之驚神默計巧竭智匱主進者書勝負之數於牘視其所
喪又倍前籍焉觀者曰以夫人之褊心亦將詬碁而抵枰
矣旣乃恬而不恤赧然有失鵠求身之色人咸異之子劉
子曰先人者制人博投是已從人者制於人枯碁是已二
者豈有數存於其間哉但處之勢異耳是知當軸者易生
嫌而退身者易爲譽易生之嫌不足貶也易爲之譽不足
多也在辨其所處而已

觀市

由命士以上不入於市周禮有焉乃今觀之蓋有因也元

和二年沅南不雨自季春至於六月毛澤將盡郡守有志於民誠信而雩遂徧山川方社又不雨遂遷市於城門之遠余得自麗譙而俯焉肇下令之日布市籍者咸至夾軌道而分次焉其左右前後班間錯峙如在闔之制其列題區榜揭價名物參外夷之貨馬牛有繘私屬有閑在巾笥者織文及素焉在几閣者彫彤及質焉在筐筥者白黑巨細焉業於饗者列饗饎陳麩餌而苾然業於酒者舉酒旗滌楮盃而澤然鼓刀之人設膏俎解豕羊而赫然華實之毛畋漁之生交蜚走錯水陸羣狀夥名入隧而分韞藏而待價者負挈而求沽者乘射其時者奇贏以遊者坐賈暵暵行賈遑遑利心中驚貪目不瞬於是質劑之曹較佑之倫合彼此而騰躍之冒一作易良苦之一作於巧言數量衡於儉手鈔忽之差鼓舌僨倅詆欺相高詭態橫出鼓譟譁空烟埃奮羶腥疊巾屨嚙而合之異致同歸雞鳴而爭赴日中而駢闐萬足一心恐人我先交易而退陽光西徂幅員不移徑術如初中無求隙地俱唯守犬烏烏樂得腐餘是日倚衡而閱之感其盈虛之相尋也速故著於篇云

論書

或問一有乙字曰書足以記姓名而已工與拙何損益於數哉答曰此誠有之蓋舉下之說爾非蹈中一作中道之說亦猶言

居室曰避燥溼而已言衣裳曰適寒燠而已言飲食曰充
腹而已言車馬曰代勞而已言祿位曰代耕而已今夫考
居室必以閔門豐屋爲美筭衣裳必以文章道澤爲甲評
飲食必以精良海陸爲貴第車馬必以華駟絕足爲高干
祿位必以重侯累封爲意是數者皆不行舉下之說奚獨
於書也行之邪禮曰士依於德游於藝德者何曰至曰敏
曰孝之謂藝者何禮樂射御書數之謂是則藝居三德之
後而士必游之也書居數之上而六藝之一也語曰飽食
終日無所用心難矣哉不有博奕者乎爲之猶賢乎已是
則博奕不得列於藝差愈於飽食無所用心耳吾觀今之

劉賓客文集卷二十

六

人適有面詆之曰子書居下品矣其人必道爾而笑或瞽
然不屑詆之曰子握槊奕棊居下品矣其人必赧然而媿
或艱然而色是故敢以六藝斥人不敢以六博斥人嗟乎
衆尙之移人也問者曰然則彼魏晉宋齊間亦嘗尙斯藝
矣至有君臣爭名父子不讓何哉答曰吾始欲求中道耳
子甯以尙之之弊規我歟且夫信者美德也秦繆尙之而
賢臣莫贖黃老者至道也竇后尙之而儒臣見刑道德且
不可尙矧由道德以下者哉所謂中道而言書者何處之
文學之下六博之上材鈞而善者得以加譽過一作鈞而
善者得以議能所加在乎譽非實也不黷於賞所議在乎

過非實也不紊於刑夫如是庶乎六書之學不墜墜而已乎

劉氏集略說

子劉子曰五達之井百汲而盈科未必涼而甘所處之勢然也人之詞待扣而揚猶井之利汲耳始余爲童兒居江湖間喜與屬詞者游謬以爲可教視長者所行止必操觚從之及冠舉秀才一幸而中說有司懼不厭於眾然一作

以口譽之長安中多循空言以爲誠果有名字益與曹輩攷漁於書林宵語途話琴酒調謔一曲於文章俄被召爲記室參軍會出師淮上恆磨墨於楯鼻上或寢止羣書中

劉賓客文集卷二十

七

居一二歲由旬服升諸朝凡三進班而所掌猶外府或官課或爲人所倩昌言奏記移讓告諭莫神志葬咸狼并焉及謫於沅湘間爲江山風物之所蕩往往指事成歌詩或讀書有所感輒立評議窮愁著書古儒者之大同非高冠長劍之比耳前年蒙恩澤授以郡符居海壖多雨慝作適晴喜躬曬書於庭得已書四十通遣爾自哂曰道不加益焉用是空文爲真可供警蒙藥楮耳它日子墻博陵崔生關言曰某也曷游京師偉人多問丈人新書幾何且欲取去而某應曰無有輒媿起於顏間今當復西期有以弭媿者繇是刪取四之一爲集略以貽此郎非敢行乎遠也

名子說

魏司空王昶名子制誼咸得立身之要前史是之然則書紳銘器孰若發言必稱之乎今余名爾長子曰咸允字信臣次曰同廩字敬臣欲爾於人無賢愚於事無小大咸推以信同施以敬俾物從而眾說其庶幾乎夫忠孝之於人如食與衣不可斯須離也豈俟余助哉仁義道德非訓所及可勉而企者故存乎名夫朋友字之非我職也顧名旨所在遂從而釋之孝始於親終於事君偕曰臣知終也

奏記丞相府論學事

十一月七日使持節都督夔州諸軍事夔州刺史劉某謹

劉賓客文集卷二十

八

奏記相公閣下凡今能言者皆謂天下少士而不知養材之道鬱堙而不揚非天不生材也亦猶不耕者而歎廩庾之無餘非地不產百穀也伏以貞觀中增築學舍千二百區生徒三千餘人時外夷上疏請遣子弟入附於三離者五國雖菁菁者我育材之道不足比也今之膠庠不聞絃歌而室廬圯廢生徒衰少非學官不能振學也病無貲財以給其用鰥生今有一見使大學立富幸遇相公在位可以索言之禮云凡學官春釋奠于其先師斯禮止于辟廱領宮非及天下也今四海郡縣咸以春秋上丁有事孔子廟其禮不應於古且非孔子意也炎漢初定羣臣皆起居

販爲公卿故孝惠高后之間置原廟於郡國逮孝元時革
立成以碩儒爲丞相遂建議罷之夫以子孫尙不敢違禮
以饗其祖况後學師先聖之道而首違之乎祭義曰祭不
欲數語云祭神如神在與其煩於舊饗孰若行其教道今
夫子之教日頽靡而以非禮之祀媚之斯儒者所宜憤悱
也竊觀歷代無有是事皇家武德二年詔於國學立周公
孔子廟四時致祭貞觀十二年又詔修宣尼廟於兗州至
二十年許敬宗等奏乃遣天下諸州縣置三獻官其他如
方社敬宗非通儒不能稽典禮開元中玄宗饗學與儒臣
議繇是發德音其罷郡縣釋奠牲牢唯酒脯以薦後數年

劉賓客文集卷二十

九

定令時王孫林甫爲宰相不涉學委御史中丞王敬從刊
之敬從非文儒遂以明衣牲牢編在學令是首失於敬宗
而終失於林甫習以爲常罕有敢非之者謹按本州四縣
一歲釋奠物之直緡錢十六萬有奇舉天下之郡縣當千
七百不啻羈縻者不在數中凡歲中所出於經費過四千
萬適資三獻官飾衣裳飽一作妻子而已於尙學之道無
有補焉前日詔書許列郡守臣得以上言便事今謹條奏
某乞下禮官博士詳議典制罷天下縣邑牲牢衣幣如有
生徒春秋依開元敕旨用酒醴服修脯榛栗示敬其事
而州府許如故儀然後籍其資半附益所隸州使增學校

其半率歸國庠猶不下萬計築學室其器用豐簞食增掌
固以備使令凡儒官各加稍食其紙筆鉛黃視所出州率
令折入學徒既備明經日課繕書若干紙進士命讎校亦
如之則貞觀之風粲然不殊其它郡國皆立程督投紱懷
璽棧樸菁莪良可詠矣伏惟相公發迹咸自諸生其尊素
王之道儀形四方宜在今日是以小生敢沿故事以奏記
於左右姑舉其大較至於證據纖悉條奏具之章下之日
乞留神省察不勝大願惶恐拜手稽首

澤宮詩

全唐文有引字
篇中詩不載

澤宮送士歲貢也晉昌唐如晦以信誼爲良弓文學爲菽

劉賓客文集卷二十

十

矢規爵祿猶眾禽密殼持滿遡風蜚微者數矣有措楛之
妙而無雙鷁之獲韞弓收視歸究其術繇是跡愈屈而名
愈聞君子益多之彼不由其術一幸而中者雖懸貍在廷
君子未嘗多也歲殫矣告予以西余爲賦澤宮一章庶見
子之弓弗再張也已秩秩澤宮有的維鵠祁祁庶士於以
千祿彼鵠斯微若止若翔千里之差起於毫芒我矢旣直
我弓旣良依於高墉因我不臧高墉伊何維器與時視之
以心誰謂鵠微

魏生兵要述

余爲書殿學士四年所與居皆鴻生彥士一旦詔下懷吳

郡章而東門下生咸惜是行且曰吳中富士必有知書宜
爲太守所禮者及下車閱客籍森然三千有鉅鹿魏生持
所著書來謁曰不佞始讀書爲文章凡二十年在貢士中
孤鳴甚哀卒無善聽者退而收視易慮伏北窗下考前言
成兵要十編度諸侯未遑是事將笈而西求一言以生羽
翼予取書觀之始自黃帝伏羲尤至於隋氏平江南語春
秋戰國事最備磅礴下上數千年間其擴摭評議無遺策
用是以干握兵符貴人宜有虛已而樂聞者子盍行乎吾
知元侯上舍不獨善雞鳴彈長鈇三五九九之伎顛之而
已

劉賓客文集卷二十

十一

救沈志

貞元季年夏大水熊五武溪鬪決於沅突舊防毀民家躋

高望之溟滓葩華山腹爲坻林端如沙

一作沙

湔道駛悍不

風而怒崩疑前邁浸淫旁掩柔者靡之固者脫之規者旋
環之短者顛倒之輕而泛浮者硯磻之重而高大者前卻
之生者力音殪者弛形蔽流而東若木梯然有僧愀焉誓
於路曰浮圖之慈悲救生最大能援彼於溺我當爲魁里
中兒願從四三輩皆狎川勇游者相與乘堅舟挾善器維
以修紵杙於崇邱水當洄洑人易寘力凝臚執用候可而
極大凡室處之類穴居之彙在牧之羣在豢之馴上羅黔

首下逮毛物投乎洪濶致諸生地者數十百焉適有擊獸如鴟夷而前攫持流楫首用不陷隅目傍睨其姿弭然甚如六擾之附人者其徒將取焉僧趣音促訶之曰第無濟是爲目之可里所而不能有所持矣舟中之人曰吾聞浮圖之教貴空空生普普生慈不求報施之謂空不擇善惡之謂普不逆困窮之謂慈曷也生必救而今也窮見廢無乃計善惡而忘普與慈乎僧曰甚矣問之迷且妄也我之教惡乎無善惡哉六塵者在身之不善也佛以賊視之末伽聲聞者在彼之未寤也佛以邪目之惡乎無善惡邪我曷也所援而出死地者眾矣形乾氣還各復本狀蹄者躑躅然羽者翹蕭然而言者譏譏然隨其所之吾不尸其施也不德吾則已焉能害爲彼形之乾髮髻之姿也彼氣之還暴悖之用也心足反噬而齒甘最靈是必肉我屬矣庸能躑躅譏譏之比歟夫虎之不可使知恩猶人之不可使爲虎也非吾自遺患焉爾且將貽患於眾多我罪大矣子劉子曰余聞善人在患不救不祥惡人在位不去亦不祥僧之言遠矣故志之

劉賓客文集卷二十一

唐中山劉禹錫著

雜興三十一首

學阮公體三首

少年負志氣信道不從時只言繩自直安知室可欺百勝
難慮敵三折乃良醫人生不失意焉能暴已知一作慕
知已

朔風悲老驥秋霜動鷺禽出門有遠道平野多層陰滅沒
馳絕塞振迅拂華林不因感衰節安能激壯心

昔賢多使氣憂國不謀身目覽千載事心交上古人侯門
有仁義靈臺多苦辛不學腰如磬徒使甑生塵

劉賓客文集卷二十一

偶作二首

終朝對尊酒嗜興非嗜甘終日偶眾人縱言不縱談世情
閒盡見藥性病多諳寄謝楛中散予無甚不堪
萬卷堆牀書學者識其真萬里長江水征夫度要津養生
非但藥悟佛不因人燕石何須辨逢時卽至珍

古調

一作諷古
作古詞二首

軒后初冠冕前旒爲蔽明安知從複道然後見人情
簿領乃俗士清談信古風吾觀蘇令綽朱墨一何工

寓興二首

常談卽至理安事非常情寄語何平叔無爲輕老生

世途多禮數鵬鷗各逍遙何事陶彭澤拋官爲折腰

昏鏡詞

并引

鏡之工列十鏡於賈奩發奩而視其一皎如其九霧如或曰良苦之不侔甚矣工解頤謝曰非不能盡良也蓋賈之意唯售是念今來市者必歷鑒周睭求與己宜彼皎者不能隱芒杪之瑕非美容不合是用什一其數也予感之作昏鏡詞

昏鏡非美金漠然喪其晶陋容多自欺謂若他鏡明瑕疵

旣一作闇

不見妍態隨意生一日四五照自然美傾城飾帶

以紋繡裝匣以瓊瑛秦宮豈不重非適乃爲輕

劉賓客文集卷二十一

養鷲詞

并引

途逢少年志在逐

絕句一有獸字

方呼鷹隼以襲飛走因縱觀之

卒無所獲行人有常從事於斯者曰夫鷲禽飢則爲用今

哺之過篤故然也予感之作養鷲詞

養鷲非玩形所資擊鮮力少年昧其理日月

一作日一作夜哺不

息探雛網黃口且莫有餘食甯知下韝時翅重飛不得羣

羣止林表狡兔自南北飲啄旣已盈安能勞羽翼

武夫詞

并引

有武夫過詫余以從軍之樂翌日質於通武之善經者則

曰果有樂也夫威恣而賞勞則樂用威雌

一作雄

而賞虓則

樂橫

去聲

顧其樂安出耳予惕然作是詞

武夫何洗洗在紫襲絳裳借問胡爲爾列校在鷹揚依倚
將軍勢交結少年場探丸害公吏袖刃妒名倡家產既不
事顧眄自生光酣歌高樓上祖禡大道傍昔爲編戶人秉
耒甘哺糠今來從軍樂躍馬飮持一作膏梁猶思風塵起無
種取侯王

賈客詞

并引

五方之賈以財相雄而鹽買尤熾或曰賈雄則農傷予感
之作是詞

賈客無定遊所遊唯利并眩俗雜良苦乘時取重輕心計

劉賓客文集卷二十一

三

析秋毫捶鉤侷懸衡錐刀旣無棄轉化日已盈微福禱波
神施財遊化城妻約雕金釧女垂貫珠纓高貴比封君奇
貨通倖卿趨時鷺鳥思藏鏹盤龍形大編浮通川高樓次
旗亭行止皆有樂關梁自無征農夫何爲者辛苦事寒耕

調瑟詞

并引

里有富豪翁厚自奉養而嚴督戚獲力屈形削然猶役之
無藝極一旦不堪命亡者過半追亡者亦不來復翁頓沮
而追昨非之莫及也予感之作調瑟詞

調瑟在張弦平音自足朱絲二十五闕一不成曲美人
愛高張瑤軫再三促上弦雖獨響下應不相屬日莫聲未

和寂寥一枯木卻顧膝上茲流淚難相續

讀張曲江集作

并引

世稱張曲江爲相建言放臣不宜與善地多徙五溪不毛之鄉及今讀其文自內職牧始安有瘴癘之歎自退相守荆門有拘囚之思託諷禽鳥寄詞草樹鬱然與騷人同風嗟夫身出於遐陬一失意而不能堪矧華人士族而必致醜地然後快意哉議者以曲江爲良臣識胡雛有反相羞凡器與同列密啓廷爭雖古哲人不及而燕翼無似終爲餒魂豈伎心失怨陰謫最大雖二美莫贖邪不然何袁公一言明楚獄而鍾社四葉以是相較神可誣乎予讀其文

劉賓客文集卷二十一

四

因爲詩以弔

聖言貴忠恕至道重觀身法在何所恨色傷

一作相

斯爲仁

良時難久恃陰謫豈無因寂寞韶陽廟魂歸不見人

庭梅詠寄人

蚤花常犯寒繁實常苦酸何事上春日坐令芳意闌天桃定相笑遊妓肯回看君問調金鼎方知正味難

詠古二首有所寄

車音想麟麟不見綦下塵可憐平陽第歌舞嬌青春金屋容色在文園詞賦新一朝復得幸應知失意人

寂寂照鏡臺遺基在平陽真人昔來遊翠鳳相隨翔目成

在桑野志遂貯椒房豈無三千女初心不可忘

詠史二首

驃騎非無勢少卿終不去世道劇頽波我心如砥柱
賈生明王道齋綰上車戲同遇漢文時何人居貴位

苦雨行

悠悠飛走情同樂在陽和歲中三百日常恐風雨多天人
信遐遠時節易蹉跎洞房有明燭無乃酣且歌

萋兮吟

天涯浮雲生爭蔽日月光窮巷秋風起先摧蘭蕙芳萬貨
列旗亭恣心注明瑞名高毀所集言巧智難防勿謂行大

劉賓客文集卷二十一

五

道斯須成太行莫吟萋兮什徒使君子傷

經檀道濟故壘

萬里長城壞荒營野草秋秣陵多士女猶唱白符鳩史云當時

人歌曰可憐白符鳩枉殺檀江州

題敬器圖

秦國功成思稅駕晉臣名遂歎危機無因上蔡牽黃犬願
作丹徒一布衣

聚蚊謠

沈沈夏夜閑堂開飛蚊伺暗聲如雷嘈然歛起初駭聽般
般若自南山來喧騰鼓舞喜昏黑昧者不分聰者惑露花

滴瀝月上天利觜迎人看得我軀七尺爾如芒我孤爾
眾能我傷天生有時不可遏爲爾設幄潛匡牀清商一來
秋日曉羞爾微形飼丹鳥

百舌吟

曉星寥落春雲低初聞百舌間關啼花樹滿空迷處所搖
動繁英墜紅雨笙簧百轉音韻多黃鸝吞聲燕無語東方
朝日遲遲升迎風弄景如自矜數聲不盡又飛去何許相
逢綠楊路縣蠻宛轉似娛人一心百舌何紛紛酩顏俠少
停歌聽墜珥妖姬和睡聞可憐光景何時盡誰能低回避
鷹隼廷尉張羅自不關潘郎挾彈無情損天生羽族爾何
微舌端萬變乘春輝南方朱鳥一朝見索漠無言蒿下飛

劉賓客文集卷二十一

六

飛鳶操

鳶飛杳杳青雲裏鳶鳴蕭蕭風四起旗尾飄揚勢漸高箭
頭聳劃聲相似長空悠悠霽日懸六翮不動凝飛烟遊羈
朔鴈出其下慶雲清景相回旋忽聞饑鳥一噪聚瞥下雲
中爭腐鼠騰音礪吻相喧呼仰天大嚇疑鴛雛畏人避犬
投高處俛啄無聲猶屢顧清鳥自愛玉山禾仙禽徒貴華
亭露樸遼一作棘危巢向莫時羣鵲飽腹蹲枯枝遊童挾彈
一麾肘臆碎羽分人不悲天生眾禽各有類威鳳文章在
仁義鷹隼儀形螻蟻心雖能戾天何足貴

秋螢引

漢陵秦苑遙蒼蒼
陳根腐葉秋螢光
夜空寂寥金氣淨
千門九陌飛悠揚
紛綸暉映互明滅
金鑪星噴鐙花發
露華洗濯清風吹攢昂
不定招搖垂高麗
罌過珠網斜歷璇
題舞羅幌暴衣樓上拂香帟
承露臺前轉仙掌
槐市諸生夜對書
北窗分明辨魯魚
行子東山起征思
中郎騎省悲秋氣
銅雀人歸自入簾
長門帳開來照淚
誰言向晦常自明
童兒走步嬌女爭
天生有光非自衒
遠近低昂暗中見
撮蚊祇鳥亦夜飛

一作起

翅如車輪人不見

一作而已矣

華山謠

劉賓客文集卷二十一

七

洪鑪作高山元氣鼓其橐
俄然神功就峻拔
在寥廓靈蹤露指爪
殺氣見稜角
凡木不敢生
神仙聿來託
天資帝王宅
以我一作此爲闢鑰
能令下國人一作不見換神骨
高山固無限
如此方爲嶽
丈夫無特達
雖貴猶碌碌

磨鏡篇

流塵翳明鏡
歲久看如漆
門前負局生
爲我一磨拂
萍開綠池滿
暈盡金波溢
白日照空心
圓光走幽室
山神祇氣沮
野魅眞形出
卻思未磨時
瓦礫來唐突

有獺吟

有獺得嘉魚
自謂天見憐
先祭不敢食
捧鱗望清玄
人立

寒沙上心專脰著肩一作眼漁翁以爲妖舉塊投其前一作

咽呼兒貫魚歸與獼同烹煎關關黃金鸚大翅搖江湖下
見盈尋魚投身擘洪漣攫拏隱嶙去哺雛林岳巔鴟烏欲
伺隙遙噪莫敢前長居青雲路彈射無由緣何地無江湖
何水無鮪鱸天意不宰割非祭徒虔虔空餘知禮重載在
淹中篇

劉賓客文集卷二十一終

劉賓客文集卷二十一

劉賓客文集卷二十二

唐中山劉禹錫著

五言今體三十首

天
春日退朝

紫陌夜來雨
南山朝下看
戟枝迎日動
閣影助松寒
瑞氣卷綃縠
遊光泛波瀾
御溝新柳色
處處拂歸鞍

神
經東都安國觀九仙公主舊院作

仙院御溝東
今來事不同
門開青草日
樓閉綠楊風
將犬昇天路
披霓赴月宮
武皇曾駐蹕
蹕問主人翁

天
蜀先主廟

漢末謠黃牛白腹五銖當復

劉賓客文集卷二十二

天下

一作地

英雄氣千秋
尙凜然
勢分三足鼎
業復五銖錢

得相能開國
生兒不象賢
淒涼蜀故妓
來舞魏宮前

觀八陳圖

軒皇傳上略
蜀相運神機
水落龍蛇出
沙平鵝鶴飛
波濤無動勢
鱗介避餘威
會有知兵者
臨流指是非

八月十五日夜玩月

天將今夜月
一徧洗寰瀛
暑退九霄淨
秋澄萬景清
星辰讓光彩
風露發晶英
能變人間世
翛然是玉京

許給事見示哭工部劉尚書詩因命同作

漢室賢王後

從叔望在河間

孔門高第人
濟時成國器
樂道任天

眞特達圭無玷堅貞竹有筠總戎寬得眾市義貴能貧護
塞無南牧馳心拱北辰乞身來闕下賜告臥漳濱榮耀初
題劔清羸已控神宮星徒列位隙日不回輪自昔追飛侶
今爲侍從臣素弦哀已絕青簡歎猶新未遂揮金樂空悲
撤瑟晨淒涼竹林下無復見清塵

從叔自渭北節度以疾歸朝比反拜尙書竟不

克中

二八奉和中書崔舍人八月十五日夜玩月二十韻

莫景中秋爽陰靈旣望圓騰精浮碧海分照接虞淵迴見
孤輪出高從倚蓋旋二儀含皎澈萬象共澄鮮整御當西
陸舒光麗上玄從星變風雨順日助陶甄遠近同時望晶

劉賓客文集卷二十二

二

熒此夜偏運行調玉燭潔白應金天曲沼疑瑤鏡通衢若
象筵逢人盡冰雪遇境卽神仙引素吞銀漢凝清洗綠烟
臯禽警露下鄰杵思風前水是還珠浦山成種玉田劔沈
三尺影鐙罷九枝然象外行無迹寰中影有一作遷稍當

雲闕正未映斗城懸靜對揮宸翰閑臨襞彩牋境同牛渚
上宿在鳳池邊興掩尋安道詞勝命仲宣從今紙貴後不

復詠陳篇

奉和淮南李相公蚤秋卽事寄成都武相公

敬業

八柱共承天東西別隱然遠夷爭慕化眞相故臨邊並進
夔龍位仍齊龜鶴年相公詩有齊年並進之句也同心舟已濟造膝壁

常聯對領專征寄遙持造物權斗牛添氣色井絡靜氛烟
獻可通三略分甘出萬錢漢南趨節制趙北賜山川玉帳
觀渝舞虹旌獵楚田步嫌雙綬重夢入九城偏秋與一作雨

離情動詩從樂府傳聆音還竊拊不覺撫么弦李中書自揚州見示

詩本因命仰和

元和癸巳歲仲秋詔發江陵偏師問罪蠻徼後命宣

慰釋兵歸降凱旋之辰率爾成詠寄荆南嚴司空

蠻水阻朝宗兵符下渚宮前籌得上策無戰已成功漢使
星飛入夷心草偃同歡謠開竹棧拜舞擲桑弓就日知冰
釋投人念鳥窮網羅三面解章奏九門通卉服聯操袂雕

劉賓客文集卷二十二

三

題盡鞠躬降幡秋練白驛騎畫塵紅火號休傳警機橋罷
亘空登山不見虜振旆自生風江遠煙波靜軍回氣色雄
佇看聞喜後金石賜元戎

武陵書懷五十韻 并引

按天官書武陵當翼軫之分其在春秋及戰國時皆楚地
後爲秦惠王所并置黔中郡漢興更名曰武陵東徙子今
治所常林義陵記云初項籍殺義帝於郴武陵人曰天下
憐楚而興今吾王何罪乃見殺郡民縞素哭於招屈亭高
祖聞而義之故亦曰義陵今郡城東南亭舍其所也晉宋
齊梁間皆以分王子弟事存於其書永貞元年余始以尙

書外郎出補連山寺道貶爲是郡司馬至則以方志所載而質諸其人民顧山川風物皆騷人所賦乃具所聞見而成是詩因自述其出處之所以然故用書懷爲目云

西漢開支郡南朝號戚藩四封當列宿百雉俯清沅高岸朝霞合驚湍激箭奔積陰春暗度將霽霧先昏俗尙東皇祀謠傳義帝冤桃花迷隱迹棟葉慰忠魂戶算資漁獵鄉

豪恃子孫照山畚火動踟月俚歌喧擁檝舟爲市連薈竹

覆軒披沙金粟見拾羽翹翻茗折滄溪秀蘋生在渚暄

滄溪茶爲邑人所重任渚近在郭東禽驚格磔起魚戲噏喙繁按本草經曰鷓鴣聲如鉤

輈格磔者是也沈約臺榭故李衡墟落存隱侯臺木奴洲並在湘靈悲鼓瑟

劉賓客文集卷二十二

泉客泣酬恩露變蒹葭浦星懸橘柚村虎咆空野震鼉扑

滿川渾鄰里皆遷客兒童習左言炎天無冽井霜月見芳

蓀清白家傳貴詩書志所敦列科叨甲乙從宦出邱樊結

友心多契馳聲氣尙吞士安曾重賦元禮許登門草檄嫖

姚幕巡兵戊己屯築臺先自隗送客獨留髭遂結王畿綬

來觀衢室尊鳶飛入鷹隼魚目儷璵璠曉燭羅馳道朝陽

闕帝閭王正會夷夏月朔盛旗幡獨立當瑤闕傳訶步紫

垣按章清岸獄視祭潔蘋蘩御歷昌期遠傳家寶祚蕃繇

文光夏啓神教畏軒轅內禪因天性膺圖授化元繼明懸

日月出震統乾坤大孝三朝備洪恩九族惇百川宗渤澥

五岳輔崑崙何幸逢休運微班識至尊校緡資堯樞復土

奉山園

時以本官判度支鹽鐵等兼崇陵使判官

一失貴人意徒聞太學論直

廬辭錦帳遠守愧朱轡巢幕方猶燕搶榆尙笑鯤還回過
荆郢流落感涼溫旅望花無色愁心醉不愜春江千里草
莫雨一聲猿問卜安冥數看方理病源帶賒衣改製塵澀
劍成痕三秀悲中散二毛傷虎賁來憂禦魍魅歸願牧雞
豚就日秦京遠臨風楚奏煩南登無灞岸旦夕上高原

經伏波神祠

蒙蒙篁竹下有路上壺頭漢壘麇颯鬪蠻溪霧雨愁懷人
敬遺像閱世指東流自負霸王略安知恩澤侯鄉園辭石

劉賓客文集卷二十二

五

柱筋力盡炎洲一以功名累翻思馬少游

聞董評事疾因以書贈

董生奉內典

繁露傳家學青蓮譯梵書火風乖四大文字廢三餘敬枕
晝眠晚折巾秋鬢疎武皇思視草誰許茂陵居

贈澧州高大夫司馬霞寓

前年收

一作收

錦城馬躡血泥行千里追戎首三軍許勇名

殘兵疑鶴唳空壘辨烏聲一誤雲中級南游湘水清

宿誠禪師山房題贈二首

晏坐白雲端清江直下看來人望金刹講席繞香壇虎嘯
夜林動鼉鳴秋澗寒眾音徒起滅心在淨中觀

不出孤峯上人間四十秋視身如傳舍閱世甚東流法爲
因緣立心從次第修中宵問眞偈有住是吾憂

晚泊牛渚

蘆葦晚風起秋江鱗甲生殘霞忽改色旅鴈有餘聲戍鼓
音響絕漁家燈火明無人能詠史獨自月中行

罷郡歸洛陽閑居

十年江外一作海守旦夕有歸心及此西還日空成東武吟
花間數瓊酒月下一張琴聞說功名事依前惜寸陰

城東閑遊

借問池臺主多居要路津千金買絕境永日屬閑人竹逕

劉賓客文集卷二十二

六

縈紆入花林委曲巡斜陽眾客散空鎖一園春

罷郡歸洛陽寄友人

遠謫年猶少初歸鬢已衰門閑故吏去室靜老僧期不見
蜘蛛集頻爲僂句欺穎微囊未出寒甚谷難吹溲落唯心
在平生有已知商歌夜深後聽者竟爲誰

陝州河亭陪韋五大夫雪後眺望因以留別與韋有

布衣之舊一別二紀經遷貶而歸

雪霽大陽津城池表裏春河流添馬頰原色動龍鱗萬里
獨歸客一柁篷故人因高向西望關路正飛塵

途中蚤發

中庭望啓明促促事晨征寒樹鳥初動霜橋人未行水流
白煙起日上彩霞生隱士應高枕無人問姓名

初至長安

時自外郡
再授郎官

左遷凡二紀重見帝城春老大歸朝客平安出嶺人每行
經舊處卻想似前身不改南山色其餘事事新

大和戊申歲大有年詔賜百寮出城觀秋稼謹書盛

事以俟采詩者

長安銅雀鳴秋稼與雲平玉燭調寒暑金風報順成川原
呈上瑞恩澤賜閑行欲及重城掩猶聞歌吹聲

早秋集賢院卽事

時爲
學士

劉賓客文集卷二十二

七

金數已三伏火星正西流樹含清露曉閣倚碧天秋灰瑄
應新律銅壺添夜籌商飊從朔塞爽氣入神州蕙草香書
殿槐花點御溝

一作樓

山明眞色見水淨濁煙收蚤歲忝華

省再來成白頭幸依羣玉府有

一作未

路向一作尙瀛洲

金陵懷古

潮滿冶城渚日斜征虜亭蔡一作芳洲新草綠幕府舊烟青
興廢由人事山川空地形後庭花一曲幽怨不堪聽

晝居池上亭獨陰

日午樹陰正獨陰池上亭靜看蜂教誨閑想鶴儀形法酒
調神氣清琴入性靈浩然機已息几杖復何銘

分司東都蒙襄陽李司徒相公書問因以奉寄

蚤忝金馬客晚爲商洛翁知名四海內多病一生中舉世
往還盡何人心事同幾時登峴首恃舊揖三公

奉和吏部楊尙書太常李卿二相公策免後卽事述

懷贈答十韻

文雅關西族衣冠趙北都有聲眞漢相無類勝隋珠當軸
龍爲友臨池鳳不孤九天開內殿百辟看晨趨誠滿澄欵
器成功別大鑪餘芳在公論積慶是神扶步武離台席徊
翔集帝梧銓材秉秦鏡典樂去齊竽蕭灑風塵外逢迎詩
酒徒唯應持華皓

一作待華語

更食萬錢廚

劉賓客文集卷二十二

八

門下相公榮加冊命天下同歡忝沐眷私輒敢申賀
冊命出宸衷官儀自古崇特膺平土拜光贊格天功再佩
扶陽印常乘鮑氏驄七賢遺老在猶得詠清風

病中一二禪客見問因以謝之

勞動諸賢者同來問病夫添鑪擣雞

一作烹雀

舌灑水淨龍鬚

身是芭蕉喻行須邛竹扶醫王有妙藥能乞一丸無

劉賓客文集卷二十三

唐中山劉禹錫著

古調十六首

登司馬錯故城

秦昭王命錯征五溪蠻城在武陵沅江南

將軍將秦師西南莫退服故壘清江上蒼煙晦喬木登臨
值蕭辰周覽壯前躅塹平陳葉滿墉高秋蔓綠廢井抽寒
萊毀臺生穉一作魯穀耕人得古器宿雨多遺鏃楚塞鬱重
疊蠻漠紛詰曲留此數仞基幾人傷遠目

臥病聞常山旋師策勳宥過王澤大洽因寄李六侍

御

劉賓客文集卷二十三

寂寂重寂寂病夫臥秋齋夜蟲思幽壁槁葉鳴空階南國
異氣候火旻尙昏霾瘴烟跼飛羽沴氣傷百骸昨聞凱歌
旋飲至酒如淮無戰陋丹水垂仁輕藁街清廟旣策勳圓
丘俟燔柴車書一以混幽遠靡不懷逐客顛頽久故鄉雲
雨乖禽魚各有化子欲問齊諧

謁柱山會禪師

我本山東人平生多感槩弱冠遊咸京上書金馬外結交
當世賢馳聲隘四塞勉修貴及蚤狃捷不知退錙銖揚芬
馨尋尺招瑕類淹留郢南鄙摧頽羽翰碎安能咎往事且
欲去沈痼吾師得真如自一作寄在人寰內哀我墮名網有

如翺飛輩瞳瞳揚智炬照使出昏昧靜見玄關啓歆然初心會夙尙一何微今得信可美覺路明證入便門通懺悔悟理言自忘處屯道猶泰色身豈吾寶慧性非形礙思此靈山期未卜何年載

善卷壇下作

在柱山上

先生見堯心相與去九有斯民旣已治我得安林藪道爲自然貴名是無窮壽瑤壇在此山識者常回首

武陵觀火詩

楚鄉祝融分災

一作炎

火常爲虞是時直突烟發自晨炊徒

盲風扇其威白晝曠陽烏操綆不暇汲循牆甯避踰怒如

劉賓客文集卷二十三

二

列缺光迅與焚輪俱聯延掩四達赫奕成洪鑪洵疑雲濤翻颯若鬼神趨當前迎炊施是物同膏腴金烏入梵天赤龍遊玄都騰烟透窗戶飛焰生樂爐火山摧半空星雨灑中衢瑤壇披髹漆寶樹攢珊瑚花縣與琴焦旗亭無酒濡市人委百貨邑令遺雙鳧餘勢下隈隩長燂烘舳艫吹熒照水府炙浪愁天吳災罷雲日晚心驚視聽殊高灰辨廩庾黑土連闐闐眾燼合星羅遊氛鑱人膚厚地藏宿熱遙林呈驟枯火德資生人庸可一日無御之失其道敲石彌天隅晉庫走龍劍吳宮傷燕雛五行有沴氣先哲垂訃謨宋鄭同日起時當賢大夫無奇一作苛自可樂弭患非所圖

賢守恤人瘼臨烟駐驪駒弔傷色慘怛喑失詞劬愉下令
蠲里布指期輕市租開垣適未立苦蓋自相娛山木行翦
伐江泥宜堦塗魯臣不必葺何用徵越巫

崔元受少府自貶所還遺山薑花以詩答之

故人博羅尉遺我山薑花採從碧海上來自謫僊家雲濤
潤孤根陰火照晨葩淨搖扶桑日豔對瀛洲霞世人愛芳
辛攀擷忘幽遐傳名入帝里飛駟辭天涯王濟本尙味石
崇方鬪奢雕盤多不識綺席乃增華驛馬損筋骨貴人滋
齒牙顧子藜藿士持此空嘆嗟

途中蚤發

劉賓客文集卷二十三

三

馬蹋塵上霜月明岡頭路行人朝氣銳宿鳥相辭去流水
隔遠村縵山多紅樹悠悠關塞內來往無閑步

和董庶中古散調詞贈尹果毅

昔聽東武吟壯年心已悲如何今溘落聞君辛苦辭言有
窮巷士弱齡頗尙奇讀得玄女符生當事邊時借名遊俠
窟結客幽并兒往來長楸間能帶雙韃馳崩騰天寶末塵
暗燕南垂燿火入咸陽詔徵神武師是時占軍募插羽揚
金羈萬夫列轅門觀射中戟支誓當雪國讎親愛從此辭
中宵倚長劍起視蚩尤旗介馬晨蕭蕭陳雲竟天涯陰風
獵百草旗槩光參差勇氣貫中腸視身忽如遺曾擒白馬

將虜騎不敢追貴臣上戰功名姓隨意移終歲肌骨苦他人印纍纍謁者旣清宮諸侯各罷戲上將賜北第門戟不可窺昔血下沾襟天高問無期卻尋故鄉路孤影空相隨行逢里中舊樸遯昔所嗤一言合侯王霄佩黃金龜問我何自苦可憐真數奇遲回顧徒御得色懸雙眉翻然悞世途撫已昧所宜田園已蕪沒流浪江海湄鷺禽毛翮摧不見翔雲姿衰容蔽逸氣子子無人知寂寞草玄徒長吟下書帷爲君發哀韻若扣瑤林枝有客識其真潺湲涕交頤勸爾一杯酒陶然足自怡

望衡山

劉賓客文集卷二十三

四

東南倚蓋卑維嶽資柱石前當祝融居上拂朱鳥翮青冥結精氣磅礴宣地脈還聞膚寸陰能致彌天澤

遊桃源一百韻

沅江清悠悠連山鬱岑寂回流抱絕巘皎鏡含虛碧昏且

遞明媚烟嵐紛委積香蔓垂綠潭暴龍照孤磧山下潭名綠蘿磧名

暴淵明著前志子驥思遠跡子驥事見陶先生本記寂寂無何鄉密

爾天地隔金行太元歲漁者偶探墮尋花得幽蹤窺洞穿

閭隙依微聞雞犬豁達值肝陌居人互將迎笑語如平昔

廣樂雖交奏海禽心不憚揮手一來歸故溪無處覓緜緜

五百載市朝幾遷革有路在壺中無人知地脈皇家感至

道聖祚自天錫金闕傳本枝玉函留寶厯禁山開祕宇復

戶潔靈宅

詔隸二十戶免
徭以奉灑掃

藥檢香氛氤醮壇烟冪冪我來

塵外躅瑩若朝醒析崖轉對翠屏水窮留畫鷁三休俯喬
木千級攀峭壁旭日聞撞鐘綵雲迎躡屐遂登最高頂縱
目還楚澤平湖見草青遠岸連霞赤幽尋如夢想縣思屬
空闕黃緣且忘疲耽玩近成癖清猿伺曉發瑤草陵寒折
祥禽舞蔥蘢珠樹搖玃瓌羽人顧我笑勸我稅歸輓霓衣
何飄颻童顏潔白晢重巖是藩屏馴鹿受羈勒樓居邇清
霄蘿蔦成翠帟仙翁遺竹杖王母留桃核姪女飛丹沙青
童護金液寶氣浮鼎耳神光生劒脊虛無天樂來僊宰鬼

劉賓客文集卷二十三

五

兵役丹邱肅朝禮玉札工紉繹枕中淮南方牀下阜鄉烏
明鏡坐遙夜幽籟聽淅瀝因話近世僊聳然心神惕乃言
瞿氏子骨狀非凡格往事黃先生羣兒多侮劇警然不屑
意元氣貯肝鬲往往遊不歸洞中觀博奕言高未易信猶
復加訶責一旦前致辭自云仙期迫言師有道骨前事嘗
被謫如今三山上名字在真籍悠然謝主人後歲當來覲
言畢依庭樹如烟去無迹觀者皆失次驚追紛絡繹日莫
山逕窮松風自蕭槭適逢修虵見矚目光激射如嚴三清
居不使恣搜索唯餘步綱勢八趾在沙礫至今東北隅表
以壇上石列仙徒有名世人非目擊如何庭廡際白日振

飛翮洞天豈幽遠得道如咫尺一氣無死生三光自遷易
因思人間世前路何湫窄警然此生中善祝期滿百大方
播羣類秀氣肖翕闢性靜本同和物牽成阻阨是非鬪方
寸葦血昏精魄遂令多天傷猶喜見斑白喧喧車馬馳再
再桑榆夕共安緹繡榮不悟泥途適紛吾本孤賤世業在
逢掖九流宗指歸百氏旁攜摭公卿偶慰薦鄉曲謬推擇
居安白社貧志傲玄纁辟功名希自取簪組俟揚歷書府
蚤懷鉛射宮會發的起草香生帳坐曹烏集柏賜宴聆簫
韶侍祠閱琮璧嘗聞履忠信可以行蠻貊自迷一作希古
心妄恃干時畫巧言忽成錦苦志徒食藥平地生峰巒深

劉賓客文集卷二十三

六

心有矛戟層波一震盪弱植果淪溺北渚弔靈均長岑思
亭伯禍來昧幾兆事去空歎惜塵累與時深流年隨漏滴
才能疑木鴈報施迷夷跣楚奏繫一作鍾儀商歌勞甯戚

稟性非懸解對境方感激自從嬰網羅每事問龜策王正
降雷雨環玦賜遷斥儻復夷平人誓將依羽客買山構精
舍領徒開講席冀無身外憂自有閑中益道才一作期日

就塵慮乃冰釋且欲遺姓名安能慕竹帛長生尙學致一

慨豈虛擲芝朮資糗糧煙霞拂巾幘黃石履看墮洪崖肩
可拍聊復嗟蜉蝣何煩哀虺蜴青囊既深味瓊葩亦屢摘

縱無西山資猶免長戚戚

客有爲余話登天壇遇雨之狀因以賦之

清晨登天壇半路逢陰晦疾行穿雨過卻立視雲背白日
照其上風雷走於內滉漾雪海翻槎牙玉山碎蛟龍露鬚
鬣神鬼含變態萬狀互相生百音以繁會俯觀羣動靜始
覺天宇大山頂自激明人間已霧霈豁然重昏斂澳若春
冰潰反照入松門瀑流飛縞帶遙光泛物色餘韻吟天籟
洞府撞仙鐘村墟起夕靄卻見山下侶已如迷世代間我
何處來我來雲雨外

有僧言羅浮事因爲詩以寫之

君言羅浮上容易見九垓漸高元氣壯洶湧來翼身夜宿

劉賓客文集卷二十三

七

最高峯瞻望浩無鄰海黑天宇曠星辰來逼人是時當朏
魄陰物恣騰振日光吐鯨背劍影開龍鱗倏若萬馬馳旌
旗聳齋淪又如廣樂奏金石含悲辛疑其有巨靈怪物盡
來賓陰陽迭用事乃俾夜作晨呶喔天雞鳴扶桑色昕昕
赤波千萬里踴出黃金輪下視生物息霏如隙中塵醯雞
仰雙口亦謂雲漢津世人信耳目方寸度大鈞安知視聽
外怪愕不可陳悠悠想大方此乃栢水濱知小天地大安
能識其眞

秋江蚤發

輕陰迎曉日霞霽秋江明草樹含遠思襟懷有餘清凝睇

萬象起期吟孤憤平渚鴻未矯翼而我已遐征因思市朝
人方聽晨雞鳴昏昏戀衾枕安見元氣英納爽耳目變玩
奇筋骨輕滄洲有奇趣浩蕩吾將行

裴祭酒尙書見示春歸城南青松塢別墅寄王左丞

高侍郎之什命同作

蚤宦閱人事晚懷生道機時從學省出獨望郊園歸野豹
度春水山花映巖扉石頭解金章林下步綠薇青松鬱成
塢修竹盈尺圍吟風起天籟蔽日無炎威危逕盤羊腸連
蕈聳羣飛幽谷響樵斧澄潭環釣磯因高見帝城冠蓋揚
光輝白雲難持寄清韻投所希二公如長離比翼翔太微

劉賓客文集卷二十三

八

含情謝林壑酬贈駢珠璣顧予久郎一作潛愁寂對芳菲

一聞邱中趣再撫黃金徽

和河南裴尹侍郎宿齋太

一作天

平寺詣九龍祠祈雨

二十韻

有事九龍廟絜齋梵王祠玉簫何時絕碧樹空涼颺吏散
埃墟息月高庭宇宜重城肅穆間澗水潺湲時人稀夜復
閑慮靜境亦隨緬懷斷菴足凝想乘鸞姿朱明盛農節膏
澤方愆期瞻言五靈瑞能救百穀萎咿喔晨雞鳴闌干斗
柄垂修容謁神像注意陳正詞驚颿起泓泉若召雷雨師
黑烟聳鱗甲灑液如芬絲豐隆震天衢列缺揮火旗炎空

忽淒緊高雷懸瘦縻生物已霧霈溼雲稍離披丹霞啓南
陸白水含東菑熙熙飛走適藹藹草樹滋浮光動宮觀遠
思盈川抵吳公敏於政謝守工爲詩商山有病客言賀舒
龐眉

冬夜宴河中李相公中堂命箏歌送酒

朗朗鷗雞雜絃華堂夜多思簾外雪已深坐中人半醉翠娥
發清響曲盡有餘意酌我莫憂狂老來無逸氣

劉賓客文集卷二十三終

劉賓客文集卷二十三

九

驚聞響曲盡正繪意情好莫憂狂老來無逸氣

聞聞韻絃益華堂夜多思簾外雪已深坐中人半醉翠娥
發清響曲盡有餘意酌我莫憂狂老來無逸氣

劉賓

劉賓客文集卷二十三終

思盈川抵吳公敏於政謝守工爲詩商山有病客言賀舒

到白水含東菑熙熙飛走適藹藹草樹滋浮光動宮觀遠

忽淒緊高雷懸瘦縻生物已霧霈溼雲稍離披丹霞啓南

